

JMG laksana Penilaian Rizab Tanah Negara



Shahar (tiga, kanan) ketika merasmikan majlis di Pasir Tumboh di sini, semalam.

KOTA BHARU- Jabatan Mineral dan Geosains (JMG) Malaysia melaksanakan projek Penilaian Rizab Air Tanah Negara untuk menghasilkan satu peta potensi sumber air tanah di lima lembangan utama termasuk di Lembangan Sungai Selangor, Lembangan Sungai Muda di Kedah, Lembangan Sungai Pahang, Lembangan Sungai Miri di Sarawak dan Lembangan Sungai Kedamaian-Termasuk di Sabah.

Ketua Pengarah Jabatan Mineral dan Geosains Malaysia, Shahar Effendi Abdullah Azizi berkata, kaedah itu diharap menjimatkan masa diperlukan untuk menghasilkan peta potensi air tanah di sesuatu kawasan berbanding kaedah konvensional dan memakan masa bertahun-tahun.

“Bagi kaedah ini, ia dapat memberi sumber dan bekalan air bersih yang diperolehi dari sumber air tanah dan dapat menyelesaikan masalah bekalan air bersih ketika berlakunya kesesakan di musim perayaan dan cuti sekolah yang memerlukan pengagihan air yang banyak.

“Setakat ini, kerja-kerja pembangunan telaga air tanah terus dijalankan dari masa ke semasa selaras pelaksanaan yang dirancang jabatan untuk pembangunan termasuk di Kelantan sendiri,” katanya dalam majlis perasmian dan penyerahan projek perintis telaga tiub berserta sistem penapisan air tanah ringkas berkuasa solar di Taman Sri Keranji, Pasir Tumboh di sini, semalam.

Dalam perkembangan projek perintis terbabit,

Shahar Effendi berkata, penggunaan kuasa solar terbabit merupakan satu inovasi yang dapat menjimatkan penggunaan elektrik dan mengurangkan kos penyelenggaraan.

“Kita harap dengan projek perintis ini dapat memberi kesan yang memberangsangkan untuk kita kembangkan dan bina sistem seumpama ini di lokasi lain.

“Dengan pembinaan telaga tiub solar ini juga dapat memberi kemudahan kepada kira-kira 200 penduduk di Taman Sri Keranji untuk mendapatkan bekalan air bersih dan menjimatkan masa dan kos ekoran penggunaan solar merupakan pendekatan baru yang diperkenalkan dan Kelantan merupakan perintis dalam projek ini,” katanya.